

VENDIM
Nr. 4, datë 10.1.2018

**MBI SHTYRJEN E AFATIT PËR REALIZIMIN E KUSHTEVE TË VENDOSURA NGA
ERE SHOQËRISË “ERS - 08” SHPK, MBAJTËSE E LICENCËS NR. 59, SERIA NPM08P,
“PËR NDËRTIMIN, INSTALIMIN, SHFRYTËZIMIN DHE PRODHIMIN E
ENERGJISË ELEKTRIKE NGA CENTRALE ME ERË”**

Në mbështetje të neneve 16 dhe 42, germa “a” të ligjit nr. 43/2015, “Për sektorin e energjisë elektrike”, neni 11, germa “a”; neni 104, pika 4, germa “a”, nenit 113, pika 1 dhe 3, neni 116, pika 1 të ligjit nr. 44/2015, “Kodi i Procedurave Administrative”, neni 9, germa “a”, të “Rregullores për Procedurat e Heqjes së një Licence”, bordi i ERE-s, në mbledhjen e tij të datës 10.1.2018, mbasi shqyrtoi relacionin e përgatitur nga Drejtoria e Licencimit dhe e Monitorimit të Tregut, mbi shtyrjen e afatit të ndërtimit të Parkut Eolik Kavajë, për shoqërinë “ERS-08” sh.p.k.,

konstatoi se:

- Bordi i Komisionerëve të ERE-s, me vendimin nr. 63, datë 13.6.2008, ka licencuar shoqërinë “ERS - 08” sh.p.k. në aktivitetin e ndërtimit, instalimit dhe shfrytëzimit të centraleve elektrike me erë, si dhe të prodhimit të energjisë elektrike nga Parku Eolik Kavajë, me kusht zbatimin përveç sa parashikuar në licencën “tip”, të miratuar nga Bordi i Komisionerëve për aktivitetin e prodhimit të energjisë elektrike, edhe të zbatimit të kushteve në gerrat “a”, “b”, “c”, “d” dhe “e”.

- ERE ka miratuar shtyrjen e afateve të ndërtimit të Parkut Eolik Kavajë me vendimet:

- Vendimin e Bordit të Komisionerëve nr. 46, datë 28.5.2009;

- Vendimin e Bordit të Komisionerëve nr. 135, datë 15.11.2013;

- Me vendimin e ERE nr. 85, datë 9.6.2016, është vendosur:

- Rrëzimin e kërkesës së shoqërisë “ERS-08” sh.p.k. për zgjatjen e afatit të licencës nr. 59, seria NPM08P, “Për ndërtim, instalim, shfrytëzimin të centraleve elektrike dhe prodhimin e energjisë elektrike nga Parku Eolik Kavajë”, të dhënë me vendimin nr. 63, datë 13.6.2008, të Bordit të Komisionerëve të ERE-s.

- Fillimin e procedurave për heqjen e licencës së shoqërisë “ERS-08” sh.p.k., nr. 59, seria NPM08P, të dhënë me vendimin nr. 63, datë 13.6.2008, të Bordit të Komisionerëve të ERE-s.

- “ERS-08” sh.p.k., me shkresën me nr. 521/ prot., datë 12.7.2016, ka paraqitur në ERE një ankesë, duke vënë në dijeni dhe ministrinë përgjegjëse për energjinë, për ndryshimin e vendimit të bordit të ERE-s nr. 85, datë 9.6.2016, për rrëzimin e kërkesës së shoqërisë “ERS-08” sh.p.k. dhe për zgjatjen e afatit të licencës nr. 59, seria NPM08P, dhënë me vendimin e Bordit të Komisionerëve të ERE-s nr. 63, datë 13.6.2008, për ndërtimin, instalimin, shfrytëzimin e centraleve elektrike dhe prodhimin e energjisë elektrike nga Parku Eolik Kavajë.

- ERE i është drejtuar ministrisë përgjegjëse për energjinë me shkresën nr. 736 prot., datë 16.11.2017, në mbështetje të nenit 10, pika 2, të ligjit 43/2015 “Për sektorin e energjisë elektrike”, me kërkesën për informacion dhe qëndrimin e institucionit politikbërës të sektorit të energjisë.

- ERE, me urdhrin nr. 67, datë 17.11.2016, dhe urdhrin nr. 17, datë 4.4.2017, ka ngritur grupe pune dhe ka kryer dy monitorime pranë kësaj shoqërie për të kontrolluar dhe konstatuar ecurinë e punimeve dhe nivelin e investimit.

- Nga shqyrtimi i dokumentacionit dhe kontrolli në vend, rezulton se subjekti nuk ka realizuar në afat ndërtimin e parkut eolik për shkak të:

- Tejkallimit të afatit të realizimit të fazës së përgatitjes së projektit të zbatimit, si rezultat i vonesës në etapat administrative për aprovimin dhe lirin e sheshit të ndërtimit.

- Zgjatja e afatit për grumbullimin e të dhënave të parametrave të shpejtësisë së erës për plotësimin e studimit të fizibilitetit, për përcaktimin e saktë të pozicionit të vendosjes së kullave aerogjeneratore, por

dhe e shkaktuar nga dëmtimi disa herë i pajisjeve matëse nga njerëzit.

- Për zhvillimin e projektit janë bërë investime serioze financiare dhe vonesat në realizimin e projektit janë shkaktuar përtej vullnetit të aplikuesit, i cili rezulton se ka bërë çdo përpjekje të arsyeshme për të përmbushur qëllimin.

- Së fundmi, Ministria e Infrastrukturës dhe Energjisë, me shkresën nr. 2018/1 prot., datë 26.12.2017, protokolluar me tonën nr. 736/1 prot., datë 27.12.2017, sqaron mes të tjerave se: duhet të merren masa që shtyrja e afatit të ndërtimit të këtyre aplikimeve të bëhet vetëm në rast provueshmërie për arsye objektive, që nuk kanë lejuar realizimin e projekteve brenda afatit të tyre, me qëllim që në vijim të bëhet i mundur vlerësimi dhe prioritizimi i tyre në përputhje me dispozitat e VKM-së 822, datë 7.10.2015, “Për miratimin e rregullave dhe procedurave të ndërtimit të kapaciteteve të reja prodhuese të energjisë elektrike që nuk janë objekt koncesioni”, të ndryshuar.

- Në zbatim të rekomandimeve të institucionit politikbërës, konstatimeve të grupit të monitorimit, dokumenteve të depozituara në ERE nga shoqëria rezulton se ka arsye objektive që nuk kanë lejuar realizimin e projektit brenda afatit.

Për gjithë sa më sipër, bordi i ERE-s

VENDOSI:

1. Shfuqizimin e pikës 1 të vendimit nr. 85, datë 9.6.2016, të bordit të ERE-s, “Mbi kërkesën e shoqërisë “ERS-08” sh.p.k. për shtyrjen e afateve të licencës nr. 59, seria NPM08P, “Për ndërtimin, instalimin, shfrytëzimin dhe prodhimin e energjisë elektrike nga centrale me erë, nga Parku Eolik Kavajë, të dhënë me vendimin e bordit të ERE-s nr. 63, datë 13.6.2008, të ndryshuar”.

2. Të mbyllë procedurën e nisur me vendimin nr. 85, datë 9.6.2016, të bordit të ERE-s, për heqjen e licencës nr. 59, seria NPM08P, “Për ndërtimin, instalimin, shfrytëzimin dhe prodhimin e energjisë elektrike nga centrale me erë, nga Parku Eolik Kavajë”.

3. Shtyrjen e afatit për realizimin e kushteve të vendosura nga ERE në pikën 2, germet “a”, “b”, “c”, “d” dhe “e” të vendimit nr. 63, datë 13.6.2008, “Mbi aplikimin e shoqërisë “ERS - 08” sh.p.k. për licencimin në aktivitetin e ndërtimit, instalimit dhe shfrytëzimit të centraleve elektrike me erë dhe prodhimin e energjisë elektrike nga Parku Eolik Kavajë”, për shoqërinë “ERS - 08”, mbajtëse e licencës nr. 59, seria NPM08P, “Për ndërtimin, instalimin, shfrytëzimin dhe prodhimin e energjisë elektrike nga centrale me erë, nga Parku Eolik Kavajë, deri në datën 15.11.2019.

4. Drejtoria e Licencimit dhe Monitorimit të Tregut të njoftojë aplikuesin dhe Ministrinë e Infrastrukturës dhe Energjisë për vendimin e bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

Ky vendim mund të ankimohet në Gjykatën Administrative Tiranë, brenda 30 ditëve kalendarike nga botimi në Fletoren Zyrtare.

KRYETARI
Petrit Ahmeti